

20 NOV 2002

DR MAHATHIR TINJAU TAPAK BANGLO RUNTUH

KUALA LUMPUR, 20 Nov (Bernama) -- Datuk Seri Dr Mahathir Mohamad petang ini meninjau gerakan mencari dan menyelamatkan lima mangsa yang masih terperangkap dalam runtuhannya banglo milik bekas Panglima Angkatan Tentera Jen (B) Tan Sri Ismail Omar, di Taman Hillview, Ampang.

Perdana Menteri berada di tempat kejadian selama 30 minit dari pukul 5 petang dan diberi taklimat mengenai operasi mencari dan menyelamatkan oleh Ketua Polis Selangor, Datuk Mohd Noor Hamat.

Yang turut mengiringi Perdana Menteri ialah Menteri Pertahanan Datuk Seri Najib Tun Razak yang berada di tempat kejadian sejak pagi tadi, dan Menteri Perumahan dan Kerajaan Tempatan, Datuk Seri Ong Ka Ting.

Sehingga 6.30 petang ini, tiga orang disahkan terbunuh dan lima termasuk Ismail terselamat, dalam tragedi yang berlaku pada 4.35 pagi tadi.

Ketika kejadian itu, terdapat 13 penghuni dalam banglo dua tingkat itu.

Dua daripada mangsa yang terbunuh dikenal pasti sebagai menantu Ismail, Shamsul Azhar Safei, 35, dan Zurian Aishah, 5 1/2. Identiti mayat ketiga belum dikenal pasti.

Selain Ismail, yang turut terselamat ialah anak beliau, Intan Jasmin (isteri Shamsul Azhar) dan tiga anak pasangan itu Mohd Shazwan, Ilya Syamira dan Syamir Izzat.

Mangsa yang masih dicari ialah isteri Ismail, Puan Sri Azizah Abdul Aziz, anak lelaki mereka Hijaz dan isterinya Zaradina Zaini, serta anak pasangan itu Shazman, 1 1/2 tahun. Dua pembantu rumah yang dikenali sebagai Su dan Tini turut terperangkap di bawah runtuhannya itu.

-- BERNAMA
MFJ MFJ MAI